

ጳጳርሲ ፃፊዳ ኮይር ኪታ ጋሳ ቆፋ

ሃዋሪያ ጳጳርሲ ፃፊዳ ኮይር ኪታይ ፃፊትዳይ፡ «ደሬትዳ ያሳ አሳታ» ቤተት ጌቲዳይሳታሲኔ ጉላ ኢሲያን ፑይሃ ባጋን ላሌተዳ አማኒያ አሳሳ፡ ሃ ኪታ አይፊ ቆፋይ፡ አማኖ ጋሶን ሜቶይኔ ዋይይ ጋኪዳ አሳ ሚንጱላናሳ፡ ሃ ማፃፋ ፃፊይ፡ ኢያ ሃይቁዋ፡ ኢያ ዴንዲዋ፡ ኢያ ናምዓንሉ ዩሳ ኦዲያ ዩሱስ ኪሪሰቶሳ ዋንጌላ ቃላ ኤንታ ሃሳይሴስ፡ ዩሱስ ኪሪሰቶሳ ዴዑዋ ለሚሶ ኦሊ ጌሊዲ፡ ሜቱዋ ዳንዳዓን ካንላናዳ ኤንታ ቆፊሴስ፡ ሄሳራ ጋሊዲ፡ ሜቶይ ኤንታ አማኑዋ ጌሻቴላ ፓጩይሳኔ፡ «ዩሱስ ኪሪሰቶሲ ቆንጨያ ጋላስ» ቤሲያ ዋይቶ ኤንቲ ኤካናው ዴዔይሳ ሃሳይሴስ፡

ፃፊይ፡ ኤንቲ ሜቶ ዳንዳዓና ሜላ ሚንጱይሳ ቦላ ኪሪሰቶሳ ካሊያ አሳቲ ዴዔይሳዳ ዳና ሜላ ቆፊሴስ፡

1 ጳጳርሳ ኪታ አይፊ ቆፋታ

ሳርሶ 1:1-2

ያሳይ ኑስ ኢሚዳ አቶቴላ 1:3-12

ጌሻቴላ ዲሱ 1:13-2:10

ሜቶ ዋዴ አማኒያ አሳይ ሃናናው ቤሲያባ 2:11-4:19

ጨማታሲኔ ናዓቴላታስ ኢሜቲዳ ዞሬ 5:1-11

ኩሻ ቆፋ 5:12-14

1 ታኒ፡ ዩሱስ ኪሪሰቶሳ ሃዋሪይ ጳጳርሲ፤ ጳንያሳን፡ ጋላቲያን፡ ቃጳዶቂያን፡ ኢሲያኒኔ ቢቲኒያን ቤታንቾዳ ላሌተዳ ዴዔያ ያሳይ ደሪዳ፡ አሳስ ሃ ዳብዳቢያ ፃፋሰ፡

2 ዩሱስ ኪሪሰቶሳሰ ሂንቴ ኪቲታና ሜላኔ ኢያ ሱላን ጌያና ሜላ፡ ያሳ አዋይ ባ ካሴ ኤራን ደሪዳይሳታሲኔ ጌሻ አያናን ጌዬዳ፡ ሂንቴው ኦዶ ኬሃቴላይኔ ሳርቴላይ ጌዶ፡

ጳዮና ኡፋይሳ

3 ዩሱስ ኪሪሰቶሳ ሃይቆፔ ዴንጱዲ ባ ጌታ ማርቴላን ናምዓንሉ ዩሌቴላኔ ጳዮና ኡፋይሳ ኢሚዳ ኑ ጎዳ ዩሱስ ኪሪሰቶሳ አዋይ፡ ያሳይ ጋላቴቶ፡

4 ቃሲ ያሳይ ሂንቴው ጳዮና፡ ኢቶናኔ ቡቆና ላታ ሳሎን ጊሊሲስ፡

5 ሄ ላታይ ዎዴ ወርሴላን ቆንጫናው ዳዒያ ኣቶቴላሰ ያሳ ዎልቃን ኣማኖን ሂንቴው ናጌቲዲ ዳዒሰ።

6 ሃዒ ጉላ ዎዴሰ ሂንቴ ዲማ ዲማ ፓጩን ኡንዔቲኮካ ሄሳን ኡፋይቲቴ።

7 ሄ ፓጩይ ሂንቴና ጋኪዳይ፣ ታማን ዬጊን ጳያ ዎርቃፌ ሂንቴ ኣማኖይ ኣጵኔ ቱማ ጊዳይሳ ቤሳናሳ። ሄ ፓጩቲዳ ኣማኡዎን ዬሱሰ ኪሪሰቶሲ ቆንጩያ ዎዴ ጋላታ፣ ቦንቸኔ ሳባ ሂንቴ ኤካና።

8 ሂንቴ ዬሱሳ ቤዒቤኬታ፣ ሺን ኢያ ሰቋታ። ሂንቴ ሃዒ ኢያ ቤዒቦናባ ጊዲኮካ፣ ኢያ ኣማኔታ። ቃሲ ኦዳን ቆንጩሳናው ዳንዳዒቶና ኡፋይሳኒኔ ቦንቸን ኩሚዳታ።

9 ሂንቴ ኣማኖን ናጊያ ሂንቴ ሺምፑዎ ኣቶቴላ ኤካና።

10 ኣጵ ኬሃቴላ ባጋራ ሂንቴው ጊጊዳ ሃ ኣቶቴላባ ናቤቲ ኤራናው ጊታ ኮሻኒኔ ናጎን ኮዪደሶና።

11 ኤንታን ዳዒያ ኪሪሰቶሳ ኣያናይ ኢያ ዎያባኔ ሃሳፌ ጉዬ ያና ቦንቹዎባ ካሴቲዲ ማርካቲሹ፣ ኣዉዴ ዎይኮ ዋጊዲ ሃናኔኮ ኣኬካን ፒልጊደሶና።

12 ናቤቲ ኦዲዳ ቲንቢቲይ ባንታው ጊደናሺን ሂንቴው ጊዳይሳ ያሳይ ሂንቴው ቆንጩሲሰ። ሃዒ ኣሳይ ሂንቴው ኦዲዳ ዎንጌላ ሳሎፔ ኪቴቲዳ ጌሻ ኣያና ዎልቃን ሂንቴው ኦዲደሶና። ኪታንቸቲካ ሄሳ ቤዓናው ኣሞቲደሶና።

ጌሻቴላን ዳዒቲ

13 ሄሳ ጊሾ፣ ኦሶሰ ሂንቴና ጊጊሲቴ፤ ሂንቴና ሃሪቴ። ዬሱሰ ኪሪሰቶሲ ቆንጩያ ዎዴ ሂንቴ ኤካና ኣጵ ኬሃቴላ ኡፋይሳን ናጌቴ።

14 ያሳ ናይታዳ ኢያው ኪቴቲቴ፤ ሂንቴ ካሴ ኤሮና ኦላዳ ኢታ ኣውዎ ካሎፊቴ።

15 ሺን ሂንቴና ፀጊዳ ያሳይ ጌሺ ጊዲዳይሳዳ ሂንቴካ ሂንቴ ዲሳ ኡባን ጌሺ ጊዲቴ።

16 ጌሻ ማፃፋን፣ «ታኒ ጌሺ ጊዲዳ ጊሾ ሂንቴካ ጌሺ ጊዲቴ» ጌቴቲ ያፌቲሰ።

17 ኣሳ ሶምዎ ቤያና ኢያ ኦሱዎዳ ፒርዲያ ያሳ፣ «ኦ ኣዎው» ጊዲ ፀጊያባ ጊዲኮ፣ ሃ ሳዓ ኣማላቴላ ዲሳ ያሻን ዳዒቴ።

18 ሂንቴ፣ ሂንቴ ኣዎታፔ ላቲዳ ፓላና ዴዎፑፔ ዎዜቲዳይሲ፣ ጳያ ቢራን ዎይኮ ዎርቃን ጊደናይሳ ኤሬታ።

19 ቦሬይ ዎይኮ ቦርሶይ ባይና ደርሳ ሱላዳ ኣልዎ ጊዲዳ ኪሪሰቶሳ ሱላን ዎዜቲዳታ።

20 ያሳይ አላሜይ ሜዲታናፔ ካሴ ኪሪሰቶሳ ደሪሰ፡ ሺን ሃ ወርሴላ ዋዲያን ኪሪሰቶሴ ሂንቴ ጊሾ ቆንጨሰ።

21 ሂንቴ አማኖይኔ ሂንቴ ኡፋይሳይ ያሳን ጊዳና ሜላ ኢያ ሃይቆፔ ዴንሊዲ፡ ቦንቺዳ ኪሪሰቶሳ ባጋራ ያሳን አማኔታ።

22 ሂንቴ ቱማቴላሰ ኪቴቲዲ ሂንቴናቴላ ጌሺዳታ። ሂንቴ ኢሶይ ኢሱዋ ዋዛናፔ ሲቁታ፡ ሺን ሃዒካ ቱማ ዋዛናፔ ሚንሊዲ ሲቁቲ።

23 ሂንቴ ናምዓንሉ ዩሌቲዳይ ቆያ ዜሬላፌ ጊደናሺን ሜሪናው ዴዒያ ያሳ ቃላን ቆዮና ዜሬላፌ ዩሌቲዳታ።

24 ያሳ ቃላይ፡

«አሲ ኡባይ ማታ ሜላ፤

ኢያ ቦንቾ ኡባይ ጨሻ ሜላ።

ማታይ ሜሌሰ፡ ጨሻይካ ቆሌቲሰ።

25 ሺን ጎዳ ቃላይ ሚሪናው ዴዒሰ።

ያጌሰ። ሂንቴው ኦዴቲዳ ዋንጌላ ቃላይ ሃይሳ።

2

ዴያ ሹቸኔ ጌሻ ዴሬ

1 ሂዛ፡ ኢታቴሊ ኡባ፡ ጨዋ ኡባ፡ ጨቦቴሊ ቃናቴኔ ዘጊርሲ ኡባ ሂንቴፌ ዲጊቴ።

2-3 ጎዳይ ኬሃ ጊዴይሳ ሂንቴ ኤሪዲ ሜዜቴዳይሳዳ ሃዒ ዩሌቲዳ ጉላ ናይታዳ ሂንቴ አቶቴላን ዲጨሽ ባናው ያሳ ጌሻ ቃላ ማላ ኡባ ዋዴ አሞቲቴ።

4 አሳን ቦሬቲዲ ያሳን ደሬቲዳ አልዎ ጊዲዳ ዴያ ሹቻ፡ ጎዳ ዩሱሳኮ ሺቁቴ።

5 ሂንቴ አያና ኬሊ ኬጻቲያ ዴያ ሹቻታ። ሂንቴ ዩሱሰ ኪሪሰቶሳ ባጋራ ያሳ ኡፋይሴያ አያና ያርሾ ያርሺያ ጌሻ ካሂኔታ።

6 ጌሻ ማፃፋን፡

«ሄኮ፡ ታኒ ጻዮኔ ካታማን ጎዳ ፃጶዋ ሚንሊያ፡

ደሬቲዳ፡ አልዎ ሹቻ ዋላሰ፤

ኢያን አማኒያ ኦኒካ ዩላቴና»

ያጌሰ።

7 ሃ ሹቻይ ሂንቴው አማኔይሳታሰ አልዎ፡ ሺን አማኖናይሳታሰ፡

«ጊምቤይሳቲ ካዲዲ ኢዲዳ ሹቻይ

ጎዳ ፃጶዋ ሚንሊያ፡

ኡባፌ ኣጲያ ሹቹ ገዲሰ።»

8 ቃሲካ፡

«ሃ ሹቻይ ኣሴ ጳቢያ ሹቹኔ ኣሴ ኩንዲሲያ ዛላ»
ያጌሰ። ኤንቲ ሄሳሰ ቃዴቲዳ ገሾ ያሳ ቃላ ከቲቶና ኢዲዲ
ጳቤቲዶሶና።

9 ሺን ያሳይ ጳማፔ ማላሊሲያ ባ ፖዑዋኮ ሂንቴና ጭገዲይ፡
ሂንቴ ኢያ ሎዎቴሳ ሃራታሰ ኦዳናው ዶሬቲዳ ዛሬ፡ ካዎ ካሂኔ፡
ጌሻ ዳሬኔ ያሳ ዲማ ዳሬ።

10 ሂንቴ ካሴ ያሳ ዳሬ ገዴኬታ፡ ሺን ሃዒ ሂንቴ ኢያ ዳሬ።
ሂንቴ ካሴ ማርቴላ ዳሚቤኬታ፡ ሺን ሃዒ ማርቴላ ዳሚዳታ።

ያሳ ኣይሌዳ ዴዎ

11 ታ ኢሻቶ፡ ሂንቴ ሃ ሳዓን ኢማሌኔ ቤታንቾ ገዲዳይሳዳ
ሂንቴ ሽምጽዋ ኦሊያ ኣሾ ኣሞፔ ሃካና ማላ ታኒ ሂንቴና
ዎሳይሰ።

12 ኣማናና ኣሳይ ሂንቴና ኢታ ኦሊያ ኣሳዳ ዚገርያ ዎዴ ያሳይ
ኑና ቤዓናው ያ ጋላሰ፡ ኤንቲ ሂንቴ ሎዎ ኦሱዋ ቤዒዲ ያሳ
ጋላታና ማላ ሂንቴው ሎዎ ዴዎይ ዴዎ።

13 ጎዳ ገሾ ገዲ ማታራ ዴዒያ ኣሳታሰ ሃራቲቲ፤ ኡባፌ ቦላ
ገዲያ ገሾ ካዉዋሰካ ሃራቲቲ።

14 ኤንቲ ኢታ ኦሌይሳታ ሴራናዉኔ ሎዎ ኦሌይሳታ ሳባናው
ካዉዋፔ ከቲቲዳ ገሾ ዳሪያ ኣይሴይሳታሰ ሃራቲቲ።

15 ሂንቴ፡ ሂንቴ ሎዎ ኦሱዋን ኤሮና ኤያ ኣሳ ዶና ኦይላናይሲ
ያሳ ሸኔ።

16 ያሳ ኣይሌ ገዲዲ ላዓቴላን ዳዒቲፔ ኣቲን ሂንቴ ላዓቴላ
ኢታ ኦሶሰ ካማ ኦሶፊቲ።

17 ኣሳ ኡባ ቦንቺቲ፤ ኣማኒያ ኣሳ ሲቂቲ፤ ያሳ ያዩቲ፤ ካዎ
ቦንቺቲ።

ከሪሰቶሳ ዋያ ለሚሱዋ

18 ኣይሌቶ፡ ሎዎ ጎዳታሲኔ ኬሃ ጎዳታ ፃላላሰ ገደናሺን
ኢታታሰካ ቦንቺን ሃራቲቲ።

19 ኣሲ ያሳ ገሾ ገዲ ቤሶና ዋዬ ዋዬቲኮ ያሳይ ኢያ ኣንጃና።

2:7 ማዝ 118:22 2:8 ኣሳ 8:14-15 2:9 ኬሳ 19:5-6፤ ኣሳ 43:20-21፤
ዛሬ 4:20፤ 7:6፤ 14:2፤ ቲቶ 2:14፤ ኣሳ 9:2 2:10 ሆሴ 2:23

20 ሺን ሂንቴ ናጋራ ኦሊን ሂንቴና ዳቺያ ዎዴ ሂንቴ ዳንዳዒኩ ሂንቴው አይ ጋላቴ ዳዒ? ሺን ሎዎባ ኦሊዲ ዋዬ ዳንዳዒኩ ያሳይ ሂንቴና ሄሳስ አንጃና።

21 ያሳይ ሂንቴና ግጊዳይ ሄሳ ጊሾሳ፤ ኪሪስቶሲ ሂንቴው ዋዬተሰ፤ ሂንቴ ኢያ ካላና ማላ፣ ሂንቴው ለሚሶ ጊዲሰ።

22 ኢ ናጋራ ኦሊቤና፤ ኢያ ዶናንካ ዎርዶይ ቤንቴቤና።

23 ኤንቴ ኢያ ጫያ ዎዴ ዛሪዲ ጫዪቤና። ሺን ዋዬ ኤኪሼ ሂሎ ፐርዲያ ያሳሰ ባ ፐርዳ አጋጊሰቴ ኣቲን ማንዲቤና።

24 ኮኒ ናጋራሰ ሃይቁዲ ሂሎቴላሰ ዳና ማላ ኪሪስቶሲ ባ አሹዋን ኑ ናጋራ ማስቃሊያ ቦላ ቶኪሰ፤ ሂንቴ ኢያ ማዲንላን ፓዲዳታ።

25 ካሴ ሂንቴ ኦጌ ባሊዲ ቆዩዳ ዶርሳ ማላ፣ ሺን ሃዒ ሂንቴ ሼዎፑዎ ሄሜይሳኮ ናጌይሳኮ ሲሚዳታ።

3

አዚናባኔ ማቸባ

1-2 ሄሳዳካ፣ ማቸቶ፣ ሂንቴ አዚናታፔ ያሳ ቃላሰ ኪቴቶናይሳቲ ዳዒኩካ አይኮካ ኦዳቶናሺን፣ ሂንቴ ያሻቴላኔ ሂንቴ ጌሻ ዳዑዎ ቤዒዲ አማናና ማላ ኤንታው ሃሬቲቴ።

3 ሂንቴ፣ ሂንቴ ሁዔ ፐዶኒኔ ዎርቃ አሶን ዎይኮ ሎዎ ማዎን ሂንቴ ቦላ አሳቴላ ሎይሶን ጊደፖ።

4 ሺን ሂንቴ ዎዛና ጊደን ዳዒያ ዩጌልሳቴላይ ያሳ ሲንላን ሂንቴው ዳሮ አልዎ ጊዲዲ ቆዮና፣ አሽኬኔ ዎፑ ጊዳ አያና ጊደ።

5 ያሳይ አማና ጊዳይሳ አማኒዳ ጌሻ ማጫሳቲ ቢኒ ዎዴ ባንታ አዚናታሰ ሃሬቲዲ፣ ባንታና ሄሳዳ ዳሮ ሎይሊዶሶና።

6 ሄሳዳ ሳራ አብራሃሜ፣ «ታ ጎዳው» ያጋዳ ግጋሼ፣ ኢያው ኪቴታሱ፤ ሂንቴካ አይኮካ ያዮና ሎዎባ ኦሊኮ ኢ ናይታ።

7 አዚናቶ፣ ሂንቴ ማቸቲ ሂንቴፌ ዳቡራንቸ ሜዴታ ጊዳይሳ ኤሪዲ፣ ኤንታና ቦንቸቴ፤ ሂንቴ ዎሳ ቆቦና ማላ ያሳይ አሚዳ ዳዑዎ ኤንቴ ሂንቴራ ኢሲፌ ላቲያ ጊሾ ኤንታ ቦንቸቴ።

ሎዎ ኦሊዲ ሜቶ ኤኮ

2:22 ኢሳ 53:9 2:23 ኢሳ 53:7 2:24 ኢሳ 53:5 2:25 ኢሳ 53:6
3:1-2 ኤፌ 5:22፤ ቆላ 3:18 3:3 1ጊዎ 2:9 3:6 ሜዴ 18:12 3:7
ኤፌ 5:25፤ ቆላ 3:19

8 ወርሴላን፣ ኡባይ ኢሲ ቆፋን ዳዊቲ። ኢሶይ ኢሱዋስ ቃቆቲሼ፣ ኢሻዳ ሲቁቲቲ፤ ቃሲ ኢሶይ ኢሱዋስ ከሃታኔ አሽኬታ ገዲቲ።

9 ኢታ ገሾስ ኢታ ዋይኮ ጫሻ ገሾ ጫዩዲ ዛርፒቲ፤ ሄሳ አገዲ፣ ያሳይ ሂንቲው አንጁዋ አማናው ሂንቲና ጃገዳ ገሾ አንጁቲ።

10 አይሰ ገኮ፣ ጌሻ ማፃፋይ፣
«ዴፖ ዶሴይኔ ሎፖ ዋዴ ቤፃናው ኮዬይ ኦና ገዲኮካ ባ ኢንፃርሳን ኢታባኔ ዋርዶ ኦዴቲይሳ አጎ።

11 ኢታባ ኦፊይሳ አገዲ ሎፖባ ኦፊ፤
ሳርቴላካ ኬሂ ኮዮኔ ካሎ።

12 ጎዳ አይፌይ ዊሎታኮ ጃሌሰ፤
ቃሲ ኢ ኡባ ዋዴ ኤንታ ዋሳ ሃይዜስ።

ሺን ጎዳይ ኢታባ ኦፊይሳታ ባ ሃንቆ ሶምዑዋን ጃሌሰ»
ያጌሰ።

13 ሂንቲ ሎፖባ ኦፊናው አሞቲኮ ሂንቲና ቆሃናይ ኦኔ?

14 ሃሪ አቶሺን፣ ዊሎቴላ ገሾ ሂንቲ ዋዬቲኮ አንጄቲዳይሳታ።
አሳሰ ያዮፊቲኔ ሂርጎፊቲ።

15 ኪሪሰቶሳ ሂንቲ ዋዛናን ቦንቲቲኔ ጎዳዪቲ። ያሳይ ሂንቲው አሚዳ ኡፋይሳሰ ጋሶ ኦይቺያ ኦዴሰካ ዛር አማናው ኡባ ዋዴ ጊጊ ኡቲቲ፣ ሺን ሄሳ አሽኬቲላኒኔ ያሻን ኦፊቲ።

16 ቃሲ ኪሪሰቶሳን ሂንቲ ዳዊያ ሎፖ ዴዑዋ ኢታባ ኦፊዳባዳ፣ ሂንቲና ጫያ አሳይ ዘጊርያባን ዬላታና ሜላ ሂንቲ ካሃይ ጌሺ ገድ።

17 ያሳይ ገዳባ ገዲኮ ኢታባ ኦፊዳ ገሾ ዋዬ ኤኬይሳፌ ሎፖባ ኦፊዳ ገሾ ዋዬ ኤኬይሲ ሎፖ።

18 ኪሪሰቶሲ ኦና ያሳኮ ሺሻናው ባው ዊሎ ገዲዲ ዳዊሼ፣ ናጋራንቸታ ገሾ ኢሲ ቶሆ ናጋራ ኡባሰ ሃይቁሰ፤ ኢ ባ አሳቴላን ሃይቁሰ፣ ሺን አያናን ፓዊሰ።

19 ቃሲ ሄ አያናን ኢ ቢዲ ቃሾን ዳዊያ ሹምፖታሰ ቃላ ኦዲሰ።

20 ኖሃይ ማርካቢያ ኬዲያ ዋዴ ሄ ሹምፖቲ ያሳሰ ኪቲቶና ኢዊዶሶና፣ ሺን ያሳይ ኤንታና ዳንዳዊሰ። ሆሰፑን አሳ ፃላሊ ማርካቢያን ጌሊዲ፣ ቆዮ ሃሳፌ አቲዶሶና።

3:10 ማዝ 34:12-16 3:14 ማቶ 5:10፤ ኢሳ 8:12-13 3:20 ሜዴ 6:1-7:24

21 ሄ ጳዮ ሃላይ ሃዒ ሂንቴና ኣሺያ ሂንቃቴ ለሚሶ ጊዲስ። ሃ ሂንቃቴይ ቦላ ቂታ ሜጮ ጊደናሺን ሎዖ ካሃ ያሳፌ ኤካናው ኢያ ዋሲያ ኦጌ ጊዲዲ፣ ኪሪሰቶሳ ዴንዲዋ ባጋራ ሂንቴና ኣሺስ።

22 ኢ ሳሎ ቢዲ ያሳ ኡሻቻን ኡቴዲ፣ ኪታንቸታ፣ ማታ ኣዋታኔ ዋልቃማታ ሃሪስ።

4

ያሳስ ዴዖ

1 ሄሳ ጊሾ፣ ኪሪሰቶሲ ባ ኣሹዋን ኦሰ ዋዬቴዳ ጊሾ ሂንቴካ ሄ ቆፋን ሂንቴና ዳንጨሲዲ ሚኒዲ ኤቂቴ። ኪሪሰቶሳ ጊሾ ጊዲ ባ ኣሹዋን ዋዬ ኤኪዳ ኡራይ ናጋራ ኦሲኬ ጊዲ ቃንዲዳ ኣሲ።

2 ሄ ኡራይ ባ ኣቴዳ ላይሳን ያሳ ሺኔ ኦላናው ኮዬሲፔ ኣቴን ኢታ ኣሾ ኣሞን ዴና።

3 ካሴ ሂንቴ ኣማኖና ኣሳይ ዴዒዳይሳዳ ዴዒዳታ። ሂንቴ ኢታ ኣሞን፣ ላይማቴሳን፣ ማሉን፣ ቱናቴሲ ዴንሌሲያ ዬሳን፣ ፖኪያ ኤቃ ጎይኖን ካሴ ዴዒዳ ዴሳይ ጊደና።

4 ኣማኖና ኣሳራ ሂንቴ ሾሪ ባይና ኦሱዋ ኦሉና ጊሾ ማላሌቴዲ ሂንቴና ጫዮሶና።

5 ሺን ኤንቴ ፓዖታ ቦላኔ ሃይቂዳ ኣሳ ቦላ ፐርዳናው ዴዒያ ያሳስ ዛር ኢማና።

6 ሃይቂዳ ኣሳስ ዋንጌላይ ሳባኬቴዳይ ሃይሳ ጊሾሳ። ኤንቴ ኣሳሉ ባንታ ኣሹዋን ፐርዴታና ቃሲ ባንታ ኣያናን ያሳሉ ዴዖን ደና።

7 ሂዛ፣ ኡባባሰ ዉርሴላይ ማታቴሰ። ሄሳ ጊሾ፣ ዋሳናው ዳንዳዔታና ሜላ ዋፑ ጊዳ ዋዛኒ ዴዖ፤ ማራራ ዴዒቴ።

8 ሲቆይ ዳር ናጋራ ካሚያ ጊሾ ኡባፌ ኣሉዲ ኢሶይ ኢሱዋራ ዋዛናፔ ሰቂቴቴ።

9 ዙዙዋና ኢሶይ ኢሱዋ ኢማላቴሳን ሞኪቴ።

10 ሂንቴ ያሳፌ ዴማ ዴማ ኣቶ ኬሃቴላ ኢሞታ ኤኪዳይሳዳ ሂንቴ ኢሶይ ኢሶይ ሄ ኢሙዋ ቤሲያዳ ኦይኪዲ ኢሶይ ኢሱዋ ሃጋዚቴ።

11 ዬሱስ ኪሪሰቶሳ ባጋራ ኡባባን ያሳይ ጋላቴታና ሜላ ኦኒካ ኦዲያባ ጊዲኮ ያሳፌ ቃላ ኤኪዳዳ ኦደ። ቃሲ ኦኒካ ማዲያባ ጊዲኮ ያሳይ ኢያው ኢሚያ ዋልቃዳ ማደ። ቦንቸይኔ ዋልቃይ ሜሪናፔ ሜሪና ጋካናው ኢያው ጊደ። ኣሚንዒ።

አማኖ ጋሶን ጋኪያ ዋያ

12 ታ ባጋቶ፡ ሂንቴ ታማዳ ፀ-ጊያ ዋዬ ፓጨያ ጊደራ አዲያ ዋዴ ኦራላባይ ሃኒዳዳ ማላሌቶፊቴ።

13 ሺን ኢያ ቦንቸይ ቆንጨያ ዋዴ ሂንቴ ኡፋይሳይ ጊታ ጊዳና ሜላ ኪሪሰቶሳ ዋያ ሂንቴ ኤኬይሳን ኡፋይቴቴ።

14 ኪሪሰቶሳ ሱንፋ ጊሾ ኣሲ ሂንቴና ጨያ ዋዴ ያሳ ቦንቸ አያናይ ሂንቴ ቦላ ሹምፒያ ጊሾ ሂንቴ ኣንጃቲዳይሳታ።

15 ሂንቴፌ ዋዬ ኤኪያ ኣኒካ ሹምፖ ዋዲዳዳ ዋይኮ ካይሶቲዳዳ ዋይኮ ኢታ ኦሊዳዳ ዋይኮ ጌልሶናባን ጌሊዳዳ ሃኒዲ ዋዬቶፎ።

16 ጊደሺን፡ አማኖ ጊሾ ዋዬቲኮ ኪሪሰቶሳ ሱንፋ ጊሾ ያሳ ጋላቶፔ ኣቲን ዬላቶፖ።

17 ፒርዲ ያሳ ኣሳ ቦላ ደሚያ ዋዴይ ጋኪስ፡ ሂዛ፡ ሄ ፒርዳይ ኮይሮ ኑ ቦላ ደሚያባ ጊዲኮ፡ ያሳ ዋንጌላሰ ኪቴቶና ኣሳ ወርሴላይ ኣይ ጊዳኔ?

18 ዲሎይ ኡንባን ኣቲያባ ጊዲኮ፡ ማካላንቸይኔ ናጋራንቸይ ያቲን ዋናኔ?

19 ሄሳ ጊሾ፡ ያሳ ሹኔዳ ዋዬ ኤኬይሳቲ ባንታ ሹምፑዋ ሃዳራ ባንታና ሜዲዳ፡ ኣማንሊያ ያሳሰ ኣሚሹ ሎዶባ ኦሎ።

5

ጨማታሲኔ ያላጋታስ ኣሚቴዳ ዞሬ

1 ሂዛ፡ ያሳ ኬላ ጨማታራ ጨማ ጊዲዳይሲ፡ ኪሪሰቶሳ ዋያ ማርካቴይሲኔ ቆንጨናው ዴዲያ ቦንቸዋ ሻኬታናው ዴዲያ ታኒ፡ ሂንቴ ጊደን ዴዲያ ጨማታ ዞራይስ።

2 ሂንቴ ኣዋቴሳፌ ጋርሳን ዴዲያ ያሳ ወዲያ ሄሚቴ። ያሳይ ኮዬይሳዳ ደሳናፔ ኣቲን ኡንዔቲዲ ሄሞፊቴ። ቃሲ ሚሹ ኮሻን ጊደናሺን ሃጋዛናው ዴዲያ ሎዶ ቆፋን ሄሚቴ።

3 ሂንቴ ኣዋቴሳፌ ጋርሳን ዴዲያ ወዲያሰ ለሚሶ ጊዲቴፔ ኣቲን ጎዳቶፒቴ።

4 ሄሚይሳታ ሃላቃይ ቆንጨያ ዋዴ ቆሌቶና ቦንቸ ካላቻ ሂንቴ ኤካና።

5 ሄሳዳካ፡ ያላጋቶ፡ ጨማታስ ሃሬቴቴ። ሂንቴ ኢሶይ ኢሱዋስ ኣሽኬ ጊዲቴ። ጌሻ ማፃፋን፡ «ያሳይ ኦቶራንቸታ ኢዳስ፡ ሺን ኣሽኬታስ ኣዶ ኬሃቴላ ኣሚስ» ያጌስ።

6 ያሳይ ባ ዎዴ ሂንቴና ቦንቻና ማላ ዎልቃማ ያሳ ኩሺያፕ ጋርሳን ሂንቴና ካወሸቴ።

7 ኢ ሂንቴው ቆፒያ ጊሾ ሂንቴና ሂርጊሲያ ኡባ ኢያ ቦላ ዩጊቴ።

8 ሂንቴ ሞርኬይ ያላሄይ፣ ማቲያባ ኮዩዲ፣ ጋሞዳ ጉዲሼ ሂንቴ ማታራ ዩያ ጊሾ ሂንቴና ሃሪቴኔ ባርኪቴ።

9 አላሜን ዴዲያ ሂንቴ አሻቲ ሄሳዳ ዎዩ ኤኬይሳ ኤሪዲ፣ አማሮን ማኒዲ፣ ያላሂያራ ኤቄቲቴ።

10 ባ ሜሪና ቦንቹዋሰ ኪሪሰቶሰ ዩሱሳ ባጋራ ሂንቴና ጃጊዳ አቶ ኬሃቴላ ኡባ ያሳይ፣ ጉላ ዎዴሰ ሂንቴ ዎዩቲዳፕ ጉዬ፣ ኢ ባ ሁዬን ሂንቴና ሺሻና፣ ካቲሳና፣ ማንሲዲ ኤሳና፣ ያሊሳና።

11 ሜሪናፕ ሜሪና ጋካናው ያሳይ ካዎቶ። አሚንዲ።

ወርሴላ ሳርላ

12 አማኔቲዳ አሻ ጋዳ ታ ኤኪያ ሲላሴ ባጋራ ሃ ዳብዳቢያ ሂንቴው ቃንሳን ያፋሰ። ታ ሄሳ ሂንቴው ያፊዳይ፣ ሂንቴና ዞራናወኔ ያሳ አቶ ኬሃቴላይ ቱማ ጊዴይሳ ማርካታናሳ። ሄ አቶ ኬሃቴላን ማኒዲ ኤቄቴ።

13 ሂንቴራ አሲፌ ደሬቲዳ ባቢሎኔን * ዴዲያ ዎሳ ኬላ አሳይኔ ታ ናሳ ማርቆሲ ሂንቴና፣ «ሳሮ ሳሮ» ያጌሰ።

14 ሲቆ ዩሬቴላ ዩሬቲሼ፣ ኢሶይ ኢሱዋ ሳርሲቴ። ኪሪሰቶሳን ዴዲያ ሂንቴ ኡባሰ ሳሮይ ጊዶ። አሚንዲ።

5:6 ማቶ 23:12፤ ሉቃ 14:11፤ 18:14 5:12 ሃ.ኦ 15:22፣ 40 * 5:13
ባቢሎኔን፣ ሃ ቤሳን ባቢሎኔ ጌቲቲዳይ ሮሜ ካታማ ጊዶና ኣጌና። 5:13 ሃ.ኦ
12:12፣ 25፤ 13:13፤ 15:37-39፤ ቆላ 4:10፤ ፊልሞ 24

ኦራሳ ጩቂዋ ጎፋላ
New Testament in Gofa

copyright © 2011 Wycliffe Bible Translators, Inc.

Language: Gofa

Translation by: Wycliffe Bible Translators, Inc.

Copyright Information

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Gofa

© 2011, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-25

PDF generated using Haiola and XeLaTeX on 18 Apr 2025 from source
files dated 29 Jan 2022

c35d6c73-3843-5482-b53e-7559d35deee5